

七十二家集

魏文帝集卷之九

魏文帝曹丕子桓著

書

報崔琰書

昨奉嘉命惠示雅數欲使燔翳捐褶翳已壞矣  
褶亦去焉後有此比蒙復誨諸

崔琰諫世子書附

蓋開盤于游田書之所戒魯隱觀魚春秋譏  
之此周孔之格言一經之明義殷鑒夏后詩

稱不遠于耶不樂禮以爲忌此又近者之得失不可不深察也袁族富彊公子寬放盤游滋侈義聲不聞哲人君子餒有色斯之志熊羆壯士墮於吞噬之用固所以擁徒百萬跨有河朔無所容足也今邦國殄瘁惠康未洽士女企踵所思者德况公親御戎馬上下勞慘世子宜遵大路慎以行正思經國之高略鞠鑒近戒外揚遠節深惟儲副以身爲寶而猥襲虞旅之賤服忽馳驚而陵險志雉兔之

小娛忘社稷之爲重斯誠有識所以惻心也  
惟世子燔翳捐褶以塞衆望不令老臣獲罪  
於天

與曹洪書

今魯罪兼苗桀惡稔厲莽縱使宋翟妙機械之巧田單騁奔牛之誑孫吳勒八陣之變猶無益也

曹洪與世子書附

十一月五日洪白前初破賊情倭意奢說事頗過其實得九月二十日書讀之喜咲把翫無厭亦欲令陳琳作報琳頃多事不能得爲念欲遠以爲歡故自竭老夫之思辭多不可

一二粗舉大綱以當談咲漢中地形實有險  
固四嶽三塗皆不及也彼有精甲數萬臨高  
守要一夫揮戟萬人不得進而我軍過之若  
駭鯨之決細網奔兕之觸魯縞未足以喻其  
易雖云王者之師有征無戰不義而彊古人  
常有故唐虞之世蠻夷猾夏周宣之盛亦讐  
大邦詩書歎載言其難也斯皆憑阻恃遠故  
使其然是以察茲地勢謂爲中材處之殆難  
倉卒來命陳彼妖惑之罪序王師曠蕩之德

豈不信然是夏殷所以喪而虜所以斃我之  
所以克彼之所以敗也不然商周何以不敵  
哉昔鬼方孽昧崇虎讒凶殷辛暴虐三者皆  
下科也然高宗有三年之征文王有遐脩之  
軍盟津有再駕之役然後殪戎勝殷有此武  
功焉未有星流景集飈奮霆擊長驅山河朝  
至暮捷若今者也由此觀之彼固不逮下愚  
則中才之守不然明矣在中才則謂不然而  
來示乃以爲彼之惡稔雖有孫田墨黷猶無

所救竊又疑焉何者古之用兵敵國雖亂尚  
有賢人則不伐也是故三仁未去武王還師  
宮商在虞晉不加戎季梁猶在彊楚挫謀暨  
至衆賢奔紂三國爲號明其無道有人猶可  
救也且夫墨子之守縈帶爲垣高不可登折  
箬爲械堅不可入若乃距陽平據石門據八  
陣之列騁奔牛之權焉肯土崩魚爛哉設今  
守無巧拙皆可攀附則公輸已陵宋城樂毅  
已拔卽墨矣墨翟之術何稱田單之智何貴



老夫不敏未之前聞蓋過高唐者效王豹  
之謳游睢渙者學藻續之緣聞自入益部仰  
司馬揚王之遺風有子勝斐然之志故頗奮  
文辭異於他日怪乃輕其家丘謂爲倩人是  
何言歟夫馭驥垂耳於坳牧鴻雀戢翼於汙  
池褻之者固以爲園囿之凡鳥外廐之下乘  
也及其整蘭筋揮勁翮陵厲清浮顧盼千里  
豈可謂其借翰於晨風假足於六駿哉恐猶  
未信丘言必大噱也洪白

與王朗書

帝初在東宮疫癘大起時人彫傷帝深  
感歎與大理王朗書故論撰所著典論  
詩賦百餘篇集諸儒於肅成  
門內講論大義侃侃無倦

人生有七尺之形死爲一棺之土惟立德揚名  
可以不朽其次莫如著篇籍疫癘數起士人雕  
落余獨何人能全其壽

又

宋仲子之子與魏諷謀  
反伏誅太子答朗書

昔石厚與州吁游父碯知其與亂韓子昵田蘇

稷子知其好仁故君子游必有方居必就士誠  
有以也嗟乎宋忠無石子先識之明老羅此禍  
今雖欲願行滅親之誅立純臣之節尚可得邪

又

孫權重遣使稱臣奉貢明珠百筐黃金千鎰馴  
象二頭或牝或牡擾禽鸚鵡其他珍玩盈舟溢  
航千類萬品

又

不白不愛江漢之珠而愛巴蜀之鉤此言難得

之貴寶不若易有之賤物

又

蚤虱雖細慮於安寢鼯鼠至微猶毀郊牛也

與劉曄書

劉生帽裁兩段製微不長有似里父之服今帽  
所當著

與諸將書

劉備既孤老智窮勢極正使欲與死爭則諸將  
軍便當就穴中搏取之耳

報吳王孫權書

權上書說劉備支黨四萬人馬二三千  
匹出殯歸請往掃撲以克捷爲效帝報  
之

昔隗囂之弊禍發枸邑子陽之禽變起扞關將  
軍其亢厲威武勉蹈奇功以稱吾意

又報孫權書

前使于禁郭及夫所道吾織驪馬本欲使禁白  
致之念將軍儻欲速得今故以付徐奉往此二  
馬朕之常所自乘甚調良善走數萬疋之極選  
者乘之真可樂也中國雖饒馬其知名絕足亦  
時有之耳



又報孫權書

權以使聘魏具上破備獲印綬及首級  
所得土地并表將吏功勤宜加爵賞又  
帝報使致應子崇明光鑑駉馬又以素  
書所作典論及詩賦與權詔答之

老虜邊窟越險深入曠日持久內迫罷弊外困  
智力故見身於雞頭分兵擬西陵其計不過謂  
可轉是前迹以搖動江東根未著地摧折其支  
雖未剗備五藏使身首分離其所降誅亦足使  
虜部衆兇懼昔吳漢先燒荊門後發夷陵而子  
陽無所逃其死來歙始襲略陽文叔喜之而知

隗囂無所施其巧今討此虜正似其事將軍勉  
建方略務全獨克

又報孫權書

權外託事魏而誠心不款魏遣侍中  
毗尚書固階往與盟誓并徵任子登辭  
讓不受魏乃命曹休等數道攻吳時揚  
越蠻夷多未平復內難未弭權早辭上  
書求自解屬若必不見置當  
奉還土地寄命交州帝報之

君生於擾攘之際本有從橫之志降身奉國以  
享茲祚自君策名已來貢獻盈路討備之功國  
朝仰成堙而掘之古人之所恥朕之與君大義  
已定豈樂勞師遠臨江漢廊廟之議王者所不  
得專三公上君過失皆有本末朕以不明雖有

曾母投杼之疑猶冀言者不信以爲國福故先遣使者犒勞又遣尚書侍中踐脩前言以定任子君遂辭不欲使進議者怪之又前都尉浩周勸君遣子乃實朝臣交謀以此卜君君果有辭外引隗囂遣子不終內喻竇融守忠而已世殊時異人各有心浩周之還口陳指麾益令議者發明衆嫌終始之本無所據杖故遂俛仰從群臣議今省上事款誠深至心用慨然悽愴動容卽日下詔勅諸軍但深清高壘不得妄進若

君必效忠節以解疑議登身廟到父召召兵還此  
言之誠有如大江

與孟達書

延康元年達奉部曲四千餘家歸魏時  
文帝初卽王位旣宿知有達問其來甚  
悅逆與達書達至拜散騎  
常侍領新城太守後反誅

近日有命未足達旨何者昔伊摯背商而歸周  
百里去虞而入秦樂毅感鴟夷以彈說王遵識  
逆順以去就皆審廢興之符效知成敗之必然  
故丹青畫其形容良史載其功勲聞卿姿度純  
茂器量優絕當騁能明時收名傳記今者翻然  
濯鱗清流甚相嘉樂虚心西望依依若舊下筆

屬辭歡心從之昔虞卿入趙再見取相陳平就  
漢一覲參乘孤今於卿情過於往故致所御馬  
物以昭忠愛

又與孟達書

今者海內清定萬里一統三塗無邊塵之警中  
憂無狗吠之虞以是弛固濶禁與世無疑保官  
空虛初無資任卿來相就當明孤意慎勿令家  
人續紛道路以親駭疎也若卿欲來相見且當  
先安部曲有所保固然後徐徐輕騎來東



魏文帝集卷之十

魏文帝曹子桓著

序

興論自序

初平之元董卓殺主鵠后蕩覆王室是時四海  
既困中平之政兼惡卓之凶逆家家思亂人人  
自危山東牧守咸以春秋之義衛人討州吁于  
濮言人人皆得討賊於是大興義兵名豪大俠  
富室強族飄揚雲會萬里相赴交豫之師戰于

滎陽河內之甲軍于孟津卓遂遷大駕西鄰長  
安而山東大者連郡國中者嬰城邑小者聚阡  
陌以還得存併會黃巾盛於海嶽山寇暴於并  
冀乘勝轉攻席卷而南鄉邑望烟而奔城郭覩  
塵而潰百姓死亡暴骨如莽余時年五歲上以  
世方擾亂教余學射六歲而知射又教余騎馬  
八歲而知騎射矣以時之多故每征余常從建  
安初上南征荊州至宛張繡降旬日而反亡兄  
孝廉子脩從兄安民遇害時余年十歲乘馬得

脫夫文武之道各隨時而用生于中平之季長  
于戎旅之間是以少好弓馬于今不衰逐禽輒  
十里馳射常百步日多體健心每不厭建安十  
年始定冀州滅貊貢良弓燕代獻名馬時歲之  
暮春勾芒司節和風扇物弓燥手播草淺獸肥  
與族兄子丹獵于鄴西終日手獲麋鹿九雉兔  
三十後軍南征次曲蠡尚書令荀彧奉使犒軍  
見余談論之末彧言聞君善左右射此實難能  
余言執事未覩夫項發口縱俯馬蹄而仰月支

也或喜笑曰乃爾余曰埒有常經的有常所雖  
每發輒中非至妙也若馳平原赴豐草要狡獸  
截輕禽使弓不虛彎所中必洞斯則妙矣時軍  
祭酒張京在坐顧或拊手曰善余又學擊劍閱  
師多矣四方之法各異唯京師爲善桓靈之間  
有虎賁王越善斯術稱於京師河南史阿言昔  
與越遊得其法余從阿學之精熟嘗與平虜  
將軍劉勲奮威將軍鄧展等共飲宿聞展善有  
手臂曉五兵又稱其能空手入白刃余與論劍

良久謂言將軍法非也余顧嘗好之又得善術  
因求與余對時酒酣耳熱方食芋蕪便以爲杖  
下殿數交三中其臂左右大笑展意不平求更  
爲之余言吾法急屬難相中而故齊臂耳展言  
願復一交余知其欲突以取交中也因僞深進  
展果譁前余却脚鄒正截其顙坐中驚視余還  
坐笑曰昔陽慶使淳于意去其故方更授以祕  
術今余亦願鄒將軍捐棄故伎更受要道也一  
坐盡歡夫事不可自謂已長余少曉持複自謂

無對俗名雙戟爲坐鐵室鑲楯爲蔽木戶後從  
陳國袁敏學以單攻複每爲若神對家不知所  
出先曰若逢敏於狹路重決耳余於他戲弄之  
事少所喜唯彈碁略盡其巧少爲之賦昔京師  
先王有馬合鄉侯東方安世張公子常恨不得  
與彼數子者對上雅好詩書文籍雖在軍旅手  
不釋卷每每定省從容常言人少好學則思專  
長則善忘長大而能勤學者唯吾與袁伯業耳  
余是以少誦詩論及長而備歷五經四部史漢

諸子百家之言靡不畢覽

繁欽集序

上西征余守譙繁欽從時薛訪車子能喉嚨與  
笳同音欽牋還與余盛歎之雖過其實而其文  
甚麗



陳琳集序

上平定漢中族父都護還書與余盛稱彼方土地形勢觀其辭如陳琳所叙爲也

論

典論論文

文人相輕自古而然傳毅之於班固伯仲之間耳而固小之與第超書曰武仲以能屬文爲蘭臺令史下筆不能自休夫人善於自見而文非一體鮮能備善是以各以所長相輕所短里語曰家有弊帚享之千金斯不自見之患也今之文人魯國孔融文舉廣陵陳琳孔璋山陽王粲仲宣北海徐幹偉長陳留阮瑀元瑜汝南應場

德璉泉平劉楨公幹斯七子者於學無所遺於  
辭無所假咸以自騁驥驟於千里仰齊足而並  
馳以此相服亦良難矣蓋君子審已以度人故  
能免於斯紒而作論文王粲長於辭賦徐幹時  
有齊氣然粲之匹也如粲之初征登樓槐賦征  
思幹之玄猿漏卮圓扇橘賦雖張蔡不過也然  
於他文未能稱是琳瑯之章表書記今之儔也  
應瑒和而不壯劉楨壯而不密孔融體氣高妙  
有過人者然不能持論理不勝辭至於雜以嘲

戲及其所善楊班傳也常人貴遠賤近向聲背  
實又患闇於自見謂已爲賢夫文本同而末異  
蓋奏議宜雅書論宜理銘誄尚實詩賦欲麗此  
四科不同故能之者偏也唯通才能備其體文  
以氣爲主氣之清濁有體不可力彊而致譬諸  
音樂曲度雖均節奏同檢至於引氣不齊巧拙  
有素雖在父兄不能以移子弟蓋文章經國之  
大業不朽之盛事年壽有時而盡榮樂止乎其  
身一者必至之常期未若文章之無窮是以古

之作者寄身於翰墨見意於篇籍不假良史之  
辭不託飛馳之勢而聲名自傳於後故西伯幽  
而演易周旦顯而制禮不以隱約而不務不以  
康樂而加思夫然則古人賤尺璧而重寸陰懼  
平時之過已而人多不彊力貧賤則懼於饑寒  
富貴流於逸樂遂營目前之務而遺千載之功  
日月逝於上體貌衰於下忽然與萬物遷化斯  
亦志士大痛也融等已逝唯幹著論成一家言

典論論方術

潁川郗儉能辟穀餌茯苓陵甘始亦善行氣  
老有少容廬江左慈知補導之術並爲軍吏初  
儉之至而茯苓價暴數倍議郎安平李單學其  
辟穀餐茯苓飲寒水中泄利殆至隕命後始來  
衆人無不嗚視狼顧呼吸吐納軍謀祭酒弘農  
董芬爲之過差氣閉不通良久乃蘇左慈到又  
競受其補導之術至青人嚴峻徃從問受閹豎  
真無事於斯術也人之逐聲乃至於是光和中

北海王和平亦好道術自以當仙濟南孫邕少  
事之從至京師會和平病死邕因葬之東園有  
書百餘卷藥數囊悉以送之後弟子夏榮言其  
尸解邕至今恨不取其寶書仙藥劉向惑於鴻  
寶之說君游眩於子政之言古今愚謬豈唯一  
人哉

周成漢昭論

或方周成王於漢昭帝僉高成而下昭余以爲  
周成王體上聖之休氣稟賢妣之胎誨周召爲  
保傅呂尚爲太師口能言則行人稱辭足能履  
則相者導儀曰厭威容之美耳飽仁義之聲所  
謂沈漬玄流而沐浴清風者矣猶有咎悔聆二  
叔之謗使周公東遷皇天赫怒顯明厭咎猶赦  
諸金縢稽諸國史然後乃悟不亮周公之聖德  
而信金縢之教言豈不暗哉夫孝昭父非武王



母非邑姜養惟蓋主相則榮光體不承聖化不  
胎育保無仁孝之質佐無隆平之治所謂生於  
深宮之中長於婦人之手然而德與性成行與  
體并年在二七早智夙達發燕書之詐亮霍光  
之誠豈將有敬金滕信爾更而後乃悟哉使夫  
昭成均年而立易世而化賢臣而治換樂而歌  
剗漢不獨少周不獨多也

# 漢文帝論

昔有苗不賓重華舞以干戚尉佗稱帝孝文撫以恩德吳王不朝錫之几杖以撫其意而天下賴安能弘三章之教愷悌之化欲使曩時累息之民得潤步高談無危懼之心若賈誼之才敏籌畫國政特賢臣之器管晏之姿豈若孝文大人之量哉

帝集諸儒於蕭城門內講論大義嘗嘉漢文寬仁玄默務欲以德化民有賢聖之風時諸儒或以孝文雖賢其通達國體不如賈誼帝由是著太宗論

漢武帝論

孝武帝承累世之遺業遇中國之殷阜府庫餘  
錢帛倉廩畜腐米因此有意平滅匈奴而廓清  
邊境矣故卽位之初從王恢之書設馬邑之謀  
自元光以迄征和四十五載之間征匈奴四十  
餘舉踰廣漠絕梓嶺封狼居胥禪姑嶧梁北河  
觀兵瀚海刈單于之旗勦闕氏之首探符離之  
窟掃五王之庭納休屠毘耶之附獲祭天金人  
之寶斬名王以十數馘首虜以萬計旣窮追其

敗亡又摧破其積聚虜不暇於救死扶傷疲於  
孕重墮殯元封初躬執武節告以天子自將懼  
以兩越之誅易彼符號可爲威震匈奴矣

交友論

夫陰陽交萬物成君臣交邦國治士庶交德行  
光同憂樂共富貴而友道備矣易曰上下交而  
其志同由此觀之交乃人倫之本務王道之大  
義非特士友之志也

議

田疇辭封議

昔還敖逃祿傳載其美所以激濁世勵貪夫賢  
於尸祿素餐之人也故可得而小不可得而毀  
至於田疇方斯近矣免官加刑於法爲重

連珠

連珠三首

蓋聞琴瑟高張則哀彈發節士抗行則榮名至  
是以申胥流音於南極蘇武揚聲於朔裔

蓋聞四節異氣以成歲君子殊道以成名故微  
子奔走而顯比干剖心而榮

蓋聞駕蹇服御良樂咨嗟鉛刀剖截歐冶嘆息  
故少師幸而季梁懼宰嚭狂而伍員憂

銘

露陌刀銘

於鑠良刀胡煉亶時譬諸麟角靡所任茲不逢  
不若永世寶持利用衛身以感弗治



賜鍾繇五熟釜銘

於赫有魏作漢藩輔厥相惟鍾寔幹心膂靖恭  
夙夜匪遑安處百寮師師楷茲度矩

文

卽位告天文

皇帝臣丕敢用玄牡昭告于皇皇后帝漢歷世  
二十有四踐年四百二十有六四海困窮王綱  
不立五緯錯行靈祥並見推術數者慮之古道  
咸以爲天之歷數運終茲世凡諸嘉祥民神之  
意比昭有漢數終之極魏家之符漢主以神器  
宜授於臣憲章有虞致位于丕丕震畏天命雖  
休勿休群公庶尹六事之人外及將士泊于蠻

夷君長僉曰天命不可以辭拒神器不可以久  
曠群臣不可以無主萬機不可以無統丕祗承  
皇家敢不欽承卜之守龜兆有大橫筮之三易  
兆有華兆謹擇元日與群寮登壇受帝璽綬告  
類于爾大神唯爾有神尚饗永吉兆民之望祚  
于有魏世享

哀策文

武帝哀策文

痛神曜之幽潛哀齔俎之虛置舒皇德而詠思  
遂膈臆以蒞事矧乃小子風遭不造皦皦在疚  
嗚呼皇考產我曷晚棄我曷早群臣子輔奪我  
哀願猥抑奔墓俯就權變卜葬旣從大隧旣通  
漫漫長夜窈窈玄宮有晦無明曷有所窮鹵簿  
旣整三官駢羅前驅建旗方相執戈棄此宮庭  
陟彼山阿

詩

翁蒼舒誄

曹冲字蒼舒文帝之弟也少聰察岐嶷有成人之智年十三薨卒曹公哀甚爲聘甄氏亡女與合葬贈騎都尉印綬

惟建安十有五年五月甲戌童子曹蒼舒卒嗚呼哀哉乃作誄曰

於惟淑弟懿矣純良誕豐令質荷天之光旣哲且仁爰柔克剛彼德之容茲義肇行猗歟公子終然允臧宜逢介祉以永無疆如何昊天彫斯

俊英嗚呼哀哉惟人之生忽若朝露役役百年  
暨暨行幕矧爾夙夭十三而卒何辜于天景命  
不遂兼悲增傷侘傺失氣永思長懷哀爾罔極  
貽爾良妃褫爾嘉服越以乙酉宅彼城隅增丘  
峩峩寢廟渠渠姻媾雲會充路盈衢悠悠群司  
岌岌其車傾都蕩邑爰迄爾居魂而有靈庶可  
以娛嗚呼哀哉

附錄

魏文帝紀

晉陳壽

文皇帝諱丕字子桓武帝太子也中平四年冬  
生于譙建安十六年爲五官中郎將副丞相二  
十二年立爲魏太子太祖崩嗣位爲丞相魏王  
尊王后曰王太后改建安二十五年爲延康元  
年壬戌以太中大夫賈詡爲太尉御史大夫華  
歆爲相國大理王朗爲御史大夫置散騎常侍  
侍郎各四人其宦人爲官者不得過諸署令爲

金策著令藏之石室初漢熹平五年黃龍見譙  
光祿大夫橋玄問太史令單飈此何祥也飈曰  
其國後當有王者興不及五十年亦當復見天  
事恒象此其應也內黃殷登默而記之至四十  
五年登尚在三月黃龍見譙登聞之曰單飈之  
言其驗茲乎已卯以前將軍夏侯惇爲大將軍  
滅貊扶餘單于焉耆于闐王皆各遣使奉獻夏  
四月丁巳饒安縣言白雉見庚午大將軍夏侯  
惇薨五月戊寅天子命王追尊皇祖太尉曰太



王夫人丁氏曰太王后川王子胤爲武德侯是  
月馮翊山賊鄭耳王照率衆降皆封列侯鴈泉  
黃華張掖張進等各執太守以叛金城太守蘇  
則討進斬之華降六月辛亥治兵于東郊庚午  
遂南征秋七月孫權遣使奉獻蜀將孟達率衆  
降武都氏王楊僕率種人內附居漢陽郡甲午  
軍次于譙大饗六軍及譙父老百姓于邑東八  
月石邑縣言鳳皇集冬十一月癸卯令曰諸將  
征伐士卒死亡者或未收歛吾甚哀之其告郡

國給樸櫝殯歛送致其家官爲設祭丙午行至  
曲盡漢帝以衆望在魏乃召群公卿士告祠高  
廟使兼御史大夫張音持節奉璽綬禪位冊曰  
咨爾魏王昔者帝堯禪位于虞舜舜亦以命禹  
天不于常惟歸有德漢道陵遲世失其序降及  
朕躬大亂茲昏群兇肆逆宇內顛覆賴武王神  
武拯茲難于四方惟清區夏以保綏我宗廟豈  
予一人獲又俾九服實受其賜今王欽承前緒  
光于乃德恢文武之大業昭爾考之弘烈皇靈

降瑞人神告徵誕惟亮采師錫朕命僉曰爾慶  
克協于虞舜用率我唐典敬遜爾位於戲天之  
曆數在爾躬允執其中天祿永終君其祗順大  
禮饗茲萬國以肅承天命乃爲壇於繁陽庚午  
王升壇卽昨百官陪位事訖降壇視燎成禮而  
反改延康爲黃初大赦黃初元年十一月癸酉  
以河內之山陽邑萬戶奉漢帝爲山陽公行漢  
正朔以天子之禮郊祭上書不稱臣京都有事  
于太廟致胙封公之四子爲列侯追尊皇祖太

主曰太皇帝考武王曰武皇帝尊王太后曰皇太后賜男子爵人一級爲父後及孝悌力田人二級以漢諸侯王爲崇德侯列侯爲關中侯以潁陰之繁陽亭爲繁昌縣封爵增位各有差改相國爲司徒御史大夫爲司空奉常爲太常郎中令爲光祿勳大理爲廷尉太農爲大司農郡國縣邑多所改易更授匈奴南單于呼厨泉魏璽綬賜青蓋車乘輿寶劔玉玦十二月初營洛陽宮戊午幸洛陽是歲長水校尉戴陵諫不宜

數行弋獵帝大怒陵減死罪一等二年春正月  
郊祀天地明堂甲戌校獵至原陵遣使者以大  
牢祠漢世祖乙亥朝日于東郊初令郡國口蒲  
十萬者歲察孝廉一人其有秀異無拘戶口辛  
巳分三公戶邑封子弟各一人爲列侯壬午復  
潁川郡一年田租改許縣爲許昌縣以魏郡東  
部爲陽平郡西部爲廣平郡春三月加遼東太  
守公孫恭爲車騎將軍初復五銖錢夏四月以  
車騎將軍曹仁爲大將軍五月鄭甘復叛遣曹

仁討斬之六月庚子初祀五嶽四瀆咸秩群祀  
丁卯夫人甄氏卒戊辰晦日有食之有司奏免  
太尉詔勿復劾三公秋八月孫權遣使奉章并  
遣于禁等還丁巳使太常邢貞持節拜權爲大  
將軍封吳王加九錫冬十月授楊彪光祿大夫  
以穀貴罷五銖錢己卯以大將軍曹仁爲大司  
馬十二月行東巡是歲築陵雲臺三年春正月  
丙寅朔日有蝕之庚午行幸許昌宮二月鄴善  
龜茲于闐王各遣使奉獻詔曰西戎卽叙氏羌

來王詩書美之頃者西域外夷並款塞內附其  
遣使者撫勞之是後西域遂通置戊巳校尉三  
月乙丑立齊公轍爲平原王帝弟鄢陵公彰等  
十一人皆爲王初制封王之庶子爲鄉公嗣王  
之庶子爲亭侯公之庶子爲亭伯甲戌立皇子  
霖爲河東王甲午行幸襄邑夏四月戊申立鄆  
城侯植爲鄆城王癸亥行還許昌宮五月以荆  
揚江表八郡爲荊州孫權領牧故也荊州江北  
諸郡爲郢州閏月孫權破劉備于夷陵初帝聞

備兵東下與權交戰樹柵連營七百餘里謂群臣曰備不曉兵豈有七百里營可以拒敵者乎苞原隰險阻而爲軍者爲敵所禽此兵忌也孫權上事今至矣後七日破備書到秋七月冀州大蝗民饑使尚書杜畿持節開倉廩以振之八月蜀大將黃權率衆降九月庚子立皇后郭氏賜天下男子爵人二級鰥寡篤癯及貧不能自存者賜穀冬十月甲子表首陽山東爲壽陵作終制是月孫權復叛復郢州爲荊州帝自許

昌南



征諸軍兵並進權臨江拒守十一月辛丑行幸  
宛庚申晦日有食之是歲穿靈芝池四年春正  
月築南巡臺于宛三月丙申行自宛還洛陽宮  
癸卯月犯心中央大星丁未大司馬曹仁薨是  
月大疫夏五月有鵜鴈鳥集靈芝池詔舉天下  
儒德茂才獨行君子以答曹人之刺六月甲戌  
任城王彰薨于京都甲申太尉賈詡薨太白晝  
見是月大雨伊洛溢流殺人民壞廬宅秋八月  
丁卯以廷尉鍾繇爲太尉辛未校獵于熒陽遂

東巡論征孫權功諸將已下進爵增戶各有差  
九月甲辰行幸許昌宮五年春正月初命謀反  
大逆乃得相告其餘皆勿聽治敢妄相告以其  
罪罪之三月行自許昌還洛陽宮夏四月立太  
學制五經課試之法置春秋穀梁博士五月有  
司以公卿朝朔望日因奏疑事聽斷大政論辨  
得失秋七月行東巡幸許昌宮八月爲水軍親  
御龍舟循蔡潁浮淮幸壽春揚州界將吏士民  
犯五歲刑已下皆原除之九月遂至廣陵赦青

徐二州改易諸將守冬十月乙卯太白晝見行  
還許昌宮十一月庚寅以冀州饑遣使者開倉  
廩賑之戊申晦日有食之是歲穿天淵池六年  
春二月遣使者循行許昌以東盡沛郡問民所  
疾苦貧者賑貸之三月行幸召陵通討虜渠乙  
巳還許昌宮并州刺史梁習討鮮卑軻比能大  
破之辛未帝爲舟師東征五月戊申幸醴王戊  
熒惑入太微六月利成郡兵蔡方等以郡反殺  
太守徐質遣屯騎校尉任福步兵校尉段昭與

青州刺史討平之其兄脅略及亡命者皆赦其  
罪秋七月立皇子芳爲東武陽王八月帝遂以  
舟師自譙循渦入淮從陸道幸徐九月築東巡  
臺冬十月行幸廣陵故城臨江觀兵戎卒十餘  
萬旌旗數百里是歲大寒水道冰舟不得入江  
乃引還十一月東武陽王芳薨十二月自譙過  
梁遣使以大牢祀故漢太尉橋玄七年春正月  
將幸許昌許昌城南門無故自崩帝心惡之遂  
不入壬子行還洛陽宮三月築九華臺夏五月

丙辰帝疾篤召中軍大將軍曹真鎮軍大將軍  
陳群征東大將軍曹休撫軍大將軍司馬宣王  
並受遺詔輔嗣主遣後宮淑媛昭儀已下歸其  
家丁巳帝崩于嘉福殿時年四十六月戊寅塋  
首陽陵自殯及塋皆以終制從事初帝好文學  
以著述爲務自所勒成聖百篇又使諸儒撰集  
經傳隨類相從凡千餘篇號曰皇覽

評曰文帝天資文藻下筆成章博聞彊識才  
兼該若加之曠大之度勵以公平之誠邁志存

道克廣德心則古之賢主何遠之有哉

答五官中郎將書

魏麴 廙

廙轉五官中郎將文學帝  
器之命廙通草書廙答

初以尊卑有踰禮之常分也是以貪守區區之  
節不敢脩草必如嚴命誠知勞謙之素不貴殊  
異若彼之高而惇白屋如斯之好荷使郭隗不  
輕於燕九九不忽於齊樂毅自至霸業以隆  
匹夫之節成巍巍之美雖愚不敏何敢以辭

與世子書

魏王 朗

不遑惠書所以慰沃奉讀歡笑以藉饑渴雖復  
萱草忘憂皁蘇釋夢無以加也



公讌詩

魏劉禎

永日行遊戲歡樂猶未央  
邈思在玄夜相與復  
翱翔輦車飛素蓋從者盈路傍  
月出照園中珍木鬱蒼蒼  
清川過石渠流波爲魚防  
芙蓉散其華蘭苔溢金塘  
靈鳥宿水齋仁獸遊飛梁  
華館寄流波豁達來風涼  
生平未始聞歌之安能詳  
投翰長歎息綺麗不可忘

贈五官中郎將四首

劉禎

昔我從元后整駕至南鄉  
過彼豐沛都與君共

翺翺四節相推斥  
季冬風且涼  
衆賓會廣坐  
明燈燿炎光  
清歌製妙聲  
萬舞在中堂  
金樽含甘醴  
羽觴行無方  
長夜忘歸來  
聊且爲太康  
四牡向路馳  
歡悅誠未央

余嬰沈痼疾  
竄身清漳濱  
自夏涉玄冬  
彌曠十餘旬  
常恐游岱宗  
不復見故人  
所親一何篤  
步趾慰我身  
清談同日夕  
情盼似憂勤  
便復爲別辭  
遊車歸西鄰  
素葉隨風起  
廣路揚埃塵  
逝者如流水  
哀此遂離分  
追問何時會  
要我以陽春

望慕結不解貽爾新詩文勉哉修令德北面負  
寵珍

秋日多悲懷感慨以長歎終夜不遑寐叙意於  
潘翰明燈暈閣中清風淒已寒白露塗前庭應  
門重其闌四節相推斥歲月忽欲殫壯士遠出  
征戎事將獨難滄泣灑衣裳能不懷所歎

涼風吹沙礫霜氣何皚皚

五來切

明月照緹幕華

燈散炎輝賦詩連篇章極夜不知歸君侯多壯  
思文雅縱橫飛小臣信頑鹵儻晚安能追

公讌詩

王粲

昊天降豐澤，百卉挺葳蕤。涼風撤蒸暑，清雲却  
炎暉。高會君子堂，並坐蔭華棖。嘉肴充圓方，旨  
酒盈金罍。管絃發徽音，曲度清且悲。合坐同所  
樂，但慙栝行遲。嘗聞詩人語，不醉且無歸。今日  
不極歡，含情欲待誰。見眷良不翅，守分豈能違。  
古人有遺言，君子福所綏。願我賢主人，與天享  
巍巍。克符周公業，奕世不可追。

公讌詩

應瑒

巍巍主人德佳會被四方開館延群士置酒于  
斯堂辨論釋鬱結援筆興文章穆穆衆君子好  
合同歡康促坐褰重帷傳滿騰羽觴

侍五官中郎將建章臺集 應 瑒

朝馬鳴雲中音響一何哀問子遊何鄉戢翼正  
徘徊言我塞門來將就衡陽棲徃春翔北土今  
冬客南淮遠行蒙霜雪毛羽日摧頽常恐傷肌  
骨身隕沈黃泥簡珠墮沙石何能中自諧欲因  
雲雨會濯翼陵高梯良遇不可值伸眉路何階

公子敬愛客樂飲不知疲和顏旣已暢乃肯顧  
細微贈詩足存慰小子非所宜且爲極懽情不  
醉其無歸凡百敬爾位以副饑渴懷

公讌詩

阮瑀

陽春和氣動賢主以崇仁布惠綏人物降愛常  
所親上堂相娛樂中外奉時珍五味風雨集杯  
酌若浮雲

思慕文帝詩

吳質

愴愴懷殷憂殷憂不可居徙倚不能坐出入步

踟躕念蒙聖主恩榮爵與衆寡自謂永終身志  
氣甫當舒何意中見棄棄我就黃墟煢煢靡所  
恃淚下如連珠隨沒無所益身死名不書慷慨  
自俛仰庶幾烈丈夫

遺事

帝年八歲能屬文有逸才遂博覽古今經傳諸  
子百家之書善騎射好擊劍舉茂才不行

魏書

帝爲司徒趙溫所辟太祖表溫辟臣子弟選舉  
故不以實使侍中守光祿勳郗慮持節奉策免

溫官

溫帝起  
君注

楊脩與丁儀兄弟皆欲以植爲嗣太子患之以  
車載廢簏內朝歌長吳質與謀脩以白太祖未  
及推驗太子懼告質質曰何患明日復以簏受



絹車內以惑之脩必復重白重白必推而無驗  
則彼受罪矣世子從之脩果白而無人太祖由  
是疑焉

世語

魏王嘗出征世子及臨菑侯植並送路側植稱  
述功德發言有章左右屬目王亦悅焉世子悵  
然自失吳質耳曰王當行流涕可也及辭世子  
泣而拜王及左右咸歔歔於是皆以植辭多華  
而誠心不及也

世語

文帝爲五官將而臨菑侯植才名方盛各有黨

與有奪宗之議文帝使人問詔自固之術詔曰  
願將軍恢崇德度躬素士之業朝夕孜孜不違  
子道如此而已文帝從之深自砥礪太祖又嘗  
屏除左右問詔詔嘿然不對太祖曰與卿言而  
不答何也詔曰屬適有所思故不卽對耳太祖  
曰何思詔曰思袁本初劉景升父子也太祖大  
笑於是太子遂定

賈詡傳

帝升壇禮畢顧謂群臣曰舜禹之事吾知之矣

魏氏春秋

帝以素書所著典論及詩賦餉孫權又以紙寫一通與張昭

吳歷

帝善彈碁能用手巾角時有一書生又能低頭以所冠著葛巾角撒碁

博物志

太祖下鄴文帝先入袁尚府見婦人被髮垢面墮涕立紹妻劉後文帝問知是熙妻使令攬髮以袖拭面姿貌絕倫既過劉謂甄曰不復死矣遂納之有子

世語

魏甄后惠而有色先爲袁熙妻甚獲寵曹公之

屠鄴也令疾召甄左右白五官中郎已將去公

曰今年破賊正爲奴

世說新語

魏文帝納美女薛靈芸有獻火珠龍鸞釵帝曰

珠翠尚不勝况龍鸞之重乎

王子年拾遺錄

五官將知王忠昔嘗嗽人時因從駕出行令取

家間髑髏着忠馬鞍以爲嬉笑

魏畧

集評

文帝詩源出於李陵頗有仲宣之體則所計百  
許篇率皆鄙質如偶語惟西北有浮雲十餘首  
殊美贍可翫始見其工矣不然何以銓衡羣彦  
對楊厥弟者耶

詩品

魏文之才洋洋清綺舊談抑之謂去植千里然  
子建思捷而才儻詩麗而表逸子桓慮詳而力  
緩故不競於先鳴而樂府清越典論辯要迭用  
短長亦無惜焉但俗情抑揚雷同一響遂令文

帝以位尊減才思王以勢窘益價未爲篤論也

文心

雕龍

魏文帝下詔辭義多偉至於作威作福其萬慮之一弊乎

文帝詩便婉變細秀有公子氣有文士氣風雅縕藉又非六朝人主所及

詩歸

同是短歌同是善哉父子同作詳其聲意武帝之武文帝之文各在言表矣

詩歸